

Bondia maluk sira hotu, no ha'u nia respeitus ba Sua Exelénsia Señor Abrão Saldanha, Sekretáriu Estadu Joventude no Desportus.

Ha'u hakarak kongratula ami-nia membru sira husi YSEALI (Inisiativa Líderes Foinsae iha Sudeste Aziátiku) Nelania Doutel Sarmento no ninia ekipa tomak ba sira-nia programa ida-ne'e ne'ebé inovadór tebes.

Sai membru ativu ida husi ami-nia programa YSEALI, Nelania selesionada iha prosesu kompetitivu ida hodi viaja ba Estadus Unidus Amérika no hola-parté iha YSEALI nia Bolsa Akadémiku ba EmpreendedORIZMU Sosiál no Dezenvolvimentu Ekonómiku iha Universidade Brown. Nia tuir mai halo servisu ho Kingsley Loong iha Malázia hodi lori programa ida-ne'e ba-ihá Misaun Estadus Unidus iha ASEAN. Sira-nia proposta exelente no kreativu selesionadu hodi hetan finansiamentu signifikativu husi Governu Estadus Unidus hanesan parte husi YSEALI nia subvensaun Fini ba Futuru.

Ha'u mós hakarak kongratula ekipa INpaktu tanba hetan ona oportunidade iha tempu pandemia nia laran. Ho ida-ne'e, sira tenke adapta lalais sira-nia planu projetu orijinal, maibé sira persebe katak ne'e oportunidade ida atu envolve ho ema foinsae barak uza teknolojia foun no aproveita vantajen husi eskola sira ne'ebé taka hela.

Nelania no nia ekipa reprezenta buat ida ne'ebé halo ha'u entuziasmu tebes ho futuru líderes foinsae Timor-Leste nian, liu-liu líder feto sira, ne'ebé kompreende kona-ba dezafius iha sira-nia comunidades, no serbisu ho omólogu internasional sira hodi responde ba dezafiu sira ne'e. Programa ida-ne'e, no servisu husi ema hotu-hotu ne'ebé envolvidu, maka razaun tansá ha'u fiar Timor-Leste iha futuru ida ne'ebé naroman tebes.

Programa ne'e hatudu kreatividade, inovasaun, no intelijénsia. Nia hahú ho dezenvolve baze metin iha le'e Inglés, tanba Nelania no nia ekipa hatene katak habilidades lian Inglés maka xave atu asesu maioria oportunidades ba informasaun no edukasaun iha mundu.

Arte husi hakerek lori ita ba entendimentu di'ak liután kona-ba mundu ne'ebé haleu ita noabilidade hodi imajina buat hirak ita nunka hanoin-hetan antes ne'e.

Nia mós mellora ita-niaabilidade hodi hakerek no fahe ita-nia ideas no esperiénsia sira . Ha'u gosta tebes katak INpaktu nia pasu tuir mai maka enkoraja jornalizmu sosiál no promove joven sira-nia lian.

Defaktu, molok sai diplomata ida, ha'u interesada tebes atu sai jornalista internasional ida. Jornalizmu livre no independente importante tebes ba ita-nia demokrasias. Jornalizmu bele revela realidade ne'ebé ema hasoru loro-loron no halo ita-nia ofisiál eleitu sira responsabiliza. Jornalizmu Foinsae importante tebes. Nia fornese dalan ida ba joven sira hodi hatoo sira-nia lian no sai membrus ativus iha sosiedade demokrátiku ida.

Ha'u haree katak ekipa INpaktu simu ona submisoens 200 ba Konkursu Nasional Sumáriu ida-ne'e. Ne'e impresionante tebes. Ha'u hakarak kongratula ema hotu-hotu ne'ebé hola parte ona iha programa ida-ne'e. Karik imi-nia sumáriu hetan prémiu ka lae, tau iha hanoin katak prémiu loloos maka abilidades no koñesimentu hirak ne'ebé ita-boot sira dezenvolve ona ho imi-nia partisipasaun.

Ne'e apenas inísiu ida ba INpaktu nia servisu no kolaborasaun ho Embaixada Estadus Unidus Amérika iha Dili. Tantu Embaixada no INpaktu nia metas maka amplifika foinsae sira-nia lian no fornese liután oportunidades edukasaun ba foinsae Timoroan sira .

Ha'u enkoraja ita-boot sira hotu hodi hola-parté iha YSEALI sekarik imi seidauk hola-parté, no akompaña ami-nia Embaixada nia pájina Facebook, iha ne'ebé ami publika oportunidades foun barak.

Dala ida tan parabéns ba manan-nain sira husi Konkursu Nasional Sumáriu no favór-ida kontinua lee, hakerek, diskute, no fó sai imi-nia lian. Hanesan Nelania no nia ekipa hateten, "Hamutuk ita sai di'ak liután!"